


景祐乾象新書

六



十七卷 四十九頁



口

乾

十七

景祐乾象新書心尾箕斗四宿占卷第十七類訖

心宿

心宿占 心宿所管星 日蝕心宿占

日暈心宿占 月蝕心宿占 月暈心宿占

月犯心宿占 歲星犯心宿占 熒惑犯心宿占

填星犯心宿占 太白犯心宿占 辰星犯心宿占

客星犯心宿占 彗星犯心宿占 孛星犯心宿占

流星犯心宿占 雲氣犯心宿占

乾象十七

一

尾宿

尾宿占 尾宿所管星 日蝕尾宿占

日暈尾宿占 月蝕尾宿占 月暈尾宿占

月犯尾宿占 歲星犯尾宿占 熒惑犯尾宿占

填星犯尾宿占 太白犯尾宿占 辰星犯尾宿占

客星犯尾宿占 彗星犯尾宿占 孛星犯尾宿占

流星犯尾宿占 雲氣犯尾宿占

箕宿

箕宿占 箕宿所管星 日蝕箕宿占

日暈箕宿占 月蝕箕宿占 月暈箕宿占

月犯箕宿占 歲星犯箕宿占 熒惑犯箕宿占

填星犯箕宿占 太白犯箕宿占 辰星犯箕宿占

客星犯箕宿占 彗星犯箕宿占 孛星犯箕宿占

流星犯箕宿占 雲氣犯箕宿占

斗宿

斗宿占 斗宿所管星 日蝕斗宿占

日暈斗宿占 月蝕斗宿占 月暈斗宿占

月犯斗宿占 歲星犯斗宿占 熒惑犯斗宿占

填星犯斗宿占 太白犯斗宿占 辰星犯斗宿占

客星犯斗宿占 彗星犯斗宿占 孛星犯斗宿占

流星犯斗宿占 雲氣犯斗宿占

心宿占

傳曰心宿三星天王正位也中星曰明堂天子位為大辰
主天下賞罰天下變動心星見不祥前星為太子後

星為庶子心星直則王失勢 星讚曰心為天王海內
主故置積卒衛心 郝萌曰心星明大天下同心嚮
風被澤又曰心宿前後星光明赤黃者太子庶子各
有賜賀事 陶隱居曰心星欲大而明赤為天子明
德服天下暗小失色天子微弱不能明斷星動搖為
大人有憂

心宿所管星

罰星

東咸

天市

西垣

卷第十七

三

日蝕心宿占

天文惣論曰日蝕心宿將相相疑 甘德曰日蝕在心
戒之在三公九卿刑罰不中 武密曰臣下相疑政令
有失 石申曰日蝕心主民饑兵起臣下謀叛
海中占曰日蝕在心其分有兵喪王者以赦除咎

日暈心宿占

天文惣論曰日暈心其國憂 王蕃占曰日暈心王
者憂

月蝕心宿占

天文錄曰月蝕心有賊亂 天文惣論曰月蝕在心
王者惡之三公憂 郝萌曰月在心蝕公卿大夫有
黜 海中占曰月蝕心三星俱翳三將死國有饑者
武密曰月蝕心其下有喪

月暈心宿占

天文錄曰月暈心早穀貴 天文惣論曰月暈心
四足蟲為害 武密占曰月暈心將有凶 李淳

乾象十七

四

風曰月暈心麥貴 海中占曰月暈心大旱

郝萌曰月暈心三日不陰不雨有大喪又曰不陰不雨
有奇令 石申占曰月一歲再暈心有大旱及大火其
年兵起易相 海中占曰月暈心中有赤雲或白
雲大如杵而貫月大人當之或兵起 郝萌曰月
暈心再重大喜 陳卓曰月暈心穀貴 荊州占
日月暈心將易 武密曰月暈心與五星合暈王
者大憂兵起相憂

月犯心宿占

天文錄曰月犯心大臣有憂 武密曰月犯心臣下
為亂 海中占曰月犯心中央星人主惡之犯前星
太子惡之犯後星庶子惡之 河圖占曰月犯心有
亂臣在傍 武密曰月乘心其國相死出心太北國
旱宗廟火災出心太南君憂有兵起 又占曰月
變于心人主憂兵在外大將憂無兵有太子事亦
為失計於刑法又曰月奄心大星王者惡之若奄心

前星占曰貴人死亦曰太子惡之

唐憲宗元和十四年五月庚寅月犯心大星西南一
尺所至十五年正月二十七日憲宗崩穆宗即位
後梁高祖乾化二年二月戊辰月犯心大星是時帝分
兵攻蔣縣不克聞晉師將至乃自棗強疾驅而還
詰旦至貝州抄招討使楊師厚奏昨者攻擊棗強密
取蔣縣都指揮使許從實張正言朱彥柔等惟
圖自保不務立功合舉奏者詔許從實等並准

軍令處分

後梁高祖乾化二年四月甲寅月奄犯心大星占曰
其下君憂乙卯詔以星辰違度令兩京及魏博二州
禁屠宰兩月仍於佛寺開建道場至九月戊寅
郢王友珪領親信馮廷諤夜入禁中持劍刺帝遂
崩於內

漢隱帝乾祐三年七月月犯心大星至丙子誅樞
密使楊邠侍衛都指揮使史弘肇三司使王章

乾象十七

六

皆夷其族是日帝遣腹心齋密詔令澶州節度使
李洪義誅侍衛步軍指揮使王殷令鄴都護聖都
指揮使郭崇奉國都指揮使曹英害樞密使郭
威及宣徽使王峻李洪義受得密詔知事不克乃
引使人見王殷殷又遣齋密詔至鄴都郭威得
之召諸將至衙宇陳冤枉之狀諸將皆稱願從公入
朝以除君側之惡共安天下帝遣慕容彦超拒戰
大敗郭允明知事不濟乃剗刃於帝而崩

歲星犯心宿占

天文錄曰歲星入心天下諸侯有慶賀之事歲星
出入留舍心有德令天下大豐春夏穀賤秋冬平價
犯乘守心則國豐 天文摠論曰歲星經心而清昭
列天下內奉王化帝必延年 陶隱居曰歲星犯守
心則天下吉善 郗萌曰歲星入心天下諸侯有慶
賀事期九十日 荊州占曰歲星守心七日已上至七
十二日陰陽和平王者得天心忠臣皆用四夷咸伏

乾象十七

七

天下安去之七寸內有暴貴者不出一百八十日
海中占曰歲星舍心色不明有喪又曰居心五穀旱
傷 郗萌曰歲星處心東馬多死處心北牛多死
又曰出入留舍心上三十日不下冬兵起 甘德曰歲星
守心天下大豐 孝經援神契曰歲星守心年穀
豐 郗萌曰歲星逆行守心其君不重明堂
石申曰歲星逆行守心亂臣謀主 武密曰歲星乘
心大人互變又曰其國相死

後周高祖廣順元年三月甲子司天上言歲星守心
占曰歲星居心王者得天下陰陽和天下豐至七月
辛酉朔帝被袞冕御崇元殿授太廟四室寶冊于
中書令馮道等赴西京行禮應之

熒惑犯心宿占

天文錄曰熒惑犯心大臣憂犯守太子星則天下大
赦 陶隱居曰熒惑守心則地動 郝萌曰熒惑
入心大臣有叛者天子憂之 甘德曰熒惑貫心天

乾象十七

八

下有饑國 郝萌曰熒惑與心鬪天子有暴喪
司馬彪曰熒惑太白俱在心為大喪挺佐輔曰熒惑
居心陽有喜居心陰有憂 陳卓曰熒惑留心近
臣為亂 石申曰熒惑守心人主易政去其宮

海中占曰熒惑犯心民流 黃帝占曰熒惑犯心大
人惡之 巫咸曰熒惑犯心萬物不成土功興民憂
火 郝萌曰熒惑守心十日后死二十日相死三十日有
女喪又曰有反者從太子起九卿為言宗室為憂

海中占曰熒惑守心南水守心北旱一郝萌曰熒惑守
心南小男喪守心北小女喪又曰守心上下星幸臣參
乘者有事黃帝曰熒惑逆行守心大臣為亂若
入心成勾已環繞之既已去而復還居之大人憂期
六月甘德曰熒惑守心成勾已及環繞天子失其宮
石申曰熒惑守心成勾已大臣叛攻城不勝戰則將
死郝萌曰熒惑逆行守心為旱憂火若火有芒角
有伏兵海中占曰熒惑守心色赤有兵臣謀主色

白謀臣有賜爵者色青大人有憂色黑有兵必敗
黃帝曰熒惑守心色青有喪色赤有兵宿東為齊
西為秦鄭南為衛趙北為魯魏武密曰熒惑守
心色不明有喪若逆行守心主命惡之石申曰熒惑
守心主地動若色黑臣謀叛主

漢高祖十二年二月熒惑守心占曰王者惡之上擊黥
布時為流矢所中疾甚呂后迎良醫曰可治上怒曰吾
以布衣提三尺劍而取天下此非天命也命乃在天雖

扁鵲何益上遂不使治至四月甲辰帝崩于長樂宮
梁高祖武帝太清三年正月壬午熒惑守心時侯景
叛逆四方征鎮入援者三十餘萬莫有鬪志自相抄
奪而已丁卯賊攻陷宮城縱兵大掠辛未援軍退散
四月己酉帝以所未不供憂憤寢疾五月丙辰帝
崩於淨居殿

梁世祖孝元皇帝承聖三年十月熒惑守心帝觀之慨
然而謂朝臣文武曰吾觀天象將恐有賊但吉凶在

乾象十七

十

我運數由天避之何益及魏軍進逼帝乘白馬素衣
出東門抽劔擊閤曰蕭世誠一至此乎魏師至凡
二十八日召兵四方未至而城見剋在幽逼求酒飲之
製詩四絕 其一曰南風且絕唱西陵最可悲今
日還蒿里終非封禪時 其二曰人世逢百六天道
異正怕何言異螻蟻一旦損鷗鵬 其三曰松風侵
曉哀霜霰當夜來寂寥千載後誰畏軒轅臺
其四曰夜長無歲月安知秋與春原陵五株杏空

得動耕人梁王嘗遣尚書傅準監行刑帝謂之曰卿
幸為我宣行準捧詩流淚不能禁進土囊而殞之
太子諸王群臣並被害

唐太宗正觀十七年三月丁巳熒惑守心前星占曰前
星為太子熒惑犯之太子憂至四月庚辰朔皇太子
承乾有罪廢為庶人漢王元昌吏部尚書侯君集
並坐連伏誅

唐明皇天寶十三年五月熒惑守心五十餘日占曰心

乾象十七

十一

為明堂熒惑犯之為大饑兵起臣叛是秋霖雨六
十餘日物價暴貴人多乏食令出太倉米一百萬
石賤糶濟民至次年十月范陽節度使安祿山率蕃
漢之兵十餘萬自幽州反南向詣闕以誅楊國忠
為名民饑兵起

後梁高祖乾化二年五月壬戌熒惑犯心大星占曰人
君惡之尋後晉王率蕃漢大軍來援潞州攻懷夾
城梁軍大敗招討使符道昭死

填星犯心宿占

天文錄曰填星入心宿大臣喜五穀成守心則有土
功帝德廣運天下太平國安大人有喜益地

天文摠論曰填星在心其色光黃潤澤君有喜賀
事守心三十日巳上有赦 武密曰填星犯乘守凌

心則天下大赦 郗萌曰填星入心大臣有喜若出入
留舍心二十日不下者有急令 黃帝占曰填星居心

人主賢 巫咸曰填星中犯守心明堂多火災

范象十七

十三

甘德曰填星守心帝有德天下太平 巫咸曰填

星犯心主旱民多疾病 郗萌曰填星居心國安

大人有喜益地 陳卓曰填星犯心萬物不成

石申曰填星守心明聖出謀臣伏天下太平有大
赦若逆行或不去有水災或大旱 郗萌曰填星

逆行守心女主干政 武密曰填星犯心中星主命

惡之犯太子太子不利犯庶子庶子不利若填星
居心人主任賢貴清虛也其色光明赤黃有賜賀

之事若逆行成勾已環繞者其國亂

晉惠帝光熙元年九月己亥填星守心占曰多禍喪
守心國內亂天下赦是時司馬越專權終以無禮破
滅內亂十月帝崩懷帝即位大赦天下

太白犯心宿占

天文錄曰太白犯心糴貴 天文摠論曰太白犯守
心則其分有怪 李淳風曰太白犯心將軍憂兵
陶隱居曰太白守心有水災 甘德曰太白犯心三

寸已內帝親統兵劔戟上殿將軍亡群臣出

郝萌曰太白犯守心糴貴 石申曰太白守心車騎
滿野其下有喪 巫咸曰太白守心姦臣謀其主

海中占曰太白守犯心不出一年有大兵殃在貴人
郝萌曰太白犯心王者惡之有姦謀又曰天子亡
財若退守心客軍大饑 武密曰太白舍心色不
明有喪若犯乘凌守心太子位太子憂庶子位亦
然若逆行環繞心大人惡之若逆行環繞心成勾已

大人忌之 巫咸曰太白守心宮內有兵 石申曰太白
守心有火災民饑 李佺曰太白干犯勾己心大戰
不勝將軍死

漢孝桓帝永壽三年七月丁丑太白犯心前星為大臣
憂後二年四月懿獻皇后以憂死大將軍梁冀使
太倉令秦宮刺殺議郎邴尊又欲殺鄧后母宣事
覺桓帝收冀及妻孫壽襄城君印綬皆自殺誅
諸梁及孫氏宗族或徙邊

晉安帝元興元年七月庚申太白犯心占曰為兵喪是
月有湯陰之役九月王浚殺幽州刺史和演攻鄴鄴潰
於是兗豫為天下兵衝陳敏又亂楊士劉元海石勒
李雄等並起微賤跨有州郡皇后羊氏數被幽廢
後唐末帝清泰三年九月甲辰太白犯心占曰君憂
是月張勳達奏此月十五日與契丹戰於太原城王師
敗績投兵杖相藉而死者山積是夕收合餘衆保
於晉祠南晉安寨蕃軍壅而圍之自是音問阻絕

朝廷大恐

辰星犯心宿占

天文錄曰辰星犯乘守心明堂則大臣當之在陽為
燕在陰為胡不則地動有大雨 陶隱居曰辰星
犯守心則布帛貴 石申曰辰星犯守心以水滅火
三日不去主憂大臣戮 巫咸曰辰星守心僞佞煩
賦斂衆又曰為火多盜賊 海中占曰辰星犯心
民去其鄉一曰大雨不可當 武密曰辰星守心有

乾象十七

十五

大水政失紀綱 李淳風曰辰星守心多盜賊
若守乘凌心王者有內亂下臣謀上 石申曰辰
星犯心水旱並興兵革起布帛貴

客星犯心宿占

天文錄曰客星入心有德令丞相憂疾有大赦
期三月守心不過三旬有善令客星色黃白入
心左星少子受賜入右星太子受賜 天文摠論
曰客星犯乘凌心則旱君好修飾臺榭 李淳

風曰客星入心諸侯有來使者出心君使人於諸侯
荆州占曰客星守心天下有火 郝萌曰客星舍心
兵起 黃帝占曰客星守心糴貴民饑有土功
甘德曰客星入心天子有喪 郝萌曰心上有一星去
心一尺許中有謀心下一尺許有星外有謀星多
謀多星少謀少 多少者為人之多少也 心上下俱有星中外
俱有謀星遠人遠星近人近近期百日遠在衝年

彗星犯心宿占

天文錄曰彗星犯心則大臣相疑 天文摠論曰彗
星守心若出其分有蝗虫民饑 荆州占曰彗星
守心大臣謀上 武密曰彗星出心若守之有大喪
蝗虫起人民流亡又曰兵起 荆州占曰彗星守心下
臣謀上 石申曰彗星犯心大臣相疑

孛星犯心宿占

天文錄曰孛星犯守心有兵 天文摠論曰孛星
犯心大臣相疑有戮者 石申曰孛星犯心劔戟用

兵起 運斗樞曰孛星守心大臣作謀 武密曰孛星守心天子有喪德令不出蝗虫起民流亡

流星犯心宿占

天文錄曰流星入心王者惡之 天文摠論曰流星入心外國有使來流星大者大使來小者小使來若色黃則有喜 武密曰流星入心色白者有使來言義 郝萌曰流星犯心臣叛又曰其歲大臣相賊若抵心不出其年國有大喪若犯太子星太子憂犯庶子

亦然 武密曰流星入心遠國使來色赤以兵色黃以土功白以義青以憂黑以凶

乙巳略例曰流星入心遠國使來夷狄入貢大臣入賀出心天子遣使賞賜邊邑若色白有喪

雲氣犯心宿占

天文錄曰白氣入心君側有亂臣黃氣入心天子有子孫喜入心右星太子受賜入左星即庶子受賜黑氣入心右星太子有罪左星則庶子有罪黃白氣

潤澤如疋布正抵心下者諸侯有來附兵於君者
天文摠論曰青雲氣出心則天子使諸侯將出
郝萌曰青氣出心天子使諸侯 武泰曰蒼白雲
氣入心中星天子憂

尾宿占

傳曰尾九星後宮之場妃后之府上第一星后也
次三星夫人也次星嬪妾也第三星傍一星名曰神
宮解衣之內室 文耀鉤曰尾星為九子主君臣

乾象十七

十八

故君臣不和則占於尾 石申曰尾宿均明大小相承
則後宮多叙子孫蕃昌其星明后有喜不明后有
憂 郝萌曰尾宿明則五穀豐不明則五穀傷若
尾星就聚則有水災 甘德曰尾星動則臣不臣

尾宿所管星

神宮 天市垣 南門東 天江 車肆 列肆
西二星

帝座 官者 斗星 斛星 候星 宗正

傳說 市樓 西一星 魚星 龜星 天紀

日蝕尾宿占

天文錄曰日蝕尾宿則將有疾疫 天文摠論曰
日蝕尾燕有兵喪將軍死。李淳風曰日蝕在尾
有風飛沙 陶隱居曰日蝕尾則貴臣有刑 甘德
曰日蝕在尾主有疾風發屋折木人君戒之以出
武密曰日蝕在尾後宮有憂又曰燕國有喪民饑
日暈尾宿占

天文摠論曰日暈尾陰國弱 陶隱居曰日暈尾

將相有憂 巫咸曰日暈尾女主喪

月蝕尾宿占

天文錄曰月蝕尾御者樂人有當黜者 天文摠
論曰月蝕在尾貴臣有犯刑法者 武密曰月蝕尾
宿后宮惡之 甘德曰月蝕尾貴族有刑法

武密曰月蝕尾后有憂又曰御女或主御乘人當黜之
月暈尾宿占

天文錄曰月暈尾有大赦益地者 天文摠論曰月

暈尾其分當有疾疫 武密日月暈尾其分有風至
有水災 隱隱居日月在尾暈將相有憂 荊州
占日月暈尾后妃有廢者一曰女主疾又曰民多病

月犯尾宿占

天文錄日月犯尾臣不和將有憂 武密日月犯尾
貴族有憂其國將軍死一曰月在尾宿有變後宮子
孫不安 王蕃占曰女主持政

歲星犯尾宿占

乾象十七

二十

天文錄曰歲星出入留舍尾則其邦以義致天下守
尾旁則旱 天文摠論曰歲星犯守尾王者封寵
后 武密曰歲星乘犯尾則穀貴 李淳風曰歲
星守尾三十日已上王者立貴后或夫人生太子
黃帝占曰歲星入尾政在臣下 荊州占曰歲星入
尾妾為嫡臣專政 郝萌曰歲星出入留舍尾其
邦以義致天下 石申曰歲星守尾糴貴
巫咸曰歲星守尾旱多火災 海中占曰歲星留

舍尾五十日不下其國大臣亡 武密曰歲星乘犯尾
穀貴又占曰歲星犯尾燕國饑 李淳風占曰歲星
入尾主立后太子后族有昇顯者

晉孝武帝太元十九年四月歲星犯尾占曰為饑
燕國亡至二十年慕容垂遣息寶伐魏反為所破
死者數萬眾

熒惑犯尾宿占

天文錄曰熒惑入犯乘尾有兵出入留舍尾二十日

乾象十七

三

者有水災 天文摠論曰熒惑久守尾而多祲祥

后妃驚恐 石申曰熒惑入尾天下藏兵 文耀

鉤曰熒惑入尾三月客兵聚 郝萌曰熒惑入尾

宮中有讒諛者 甘德曰熒惑入尾宮人相惡

皇后憂 挺輔佐曰熒惑入尾居陽有喜居陰

有憂 武密曰熒惑入尾后妃有憂若熒惑在

尾與辰星相近天下牢開大赦 郝萌曰熒惑入

尾九州當之甲乙日入東方有咎丙丁日入南方有咎

戊己日入中央有咎庚辛日入西方有咎壬癸日入北方有咎
石申曰熒惑與填星同守尾米貴將軍出征伐

填星犯尾宿占

天文錄曰填星出入留尾必有大將出者若魚鹽貴
甘德曰填星守尾則后貴人有喜 天文摠論曰填星犯尾色黃則后妃有慶賀事

巫咸曰填星入尾兵起 海中占曰填星入尾歲荒

乾象十七

五

民饑 郝萌曰填星逆行尾妾為女主 荆州占曰填星入尾旱多盜賊 李淳風曰填星逆行尾女主不居宮又曰犯守尾者后妃惡之若填星守尾有芒角動更姓易政國兵起

太白犯尾宿占

天文摠論曰太白久留守尾其分水災 荆州占曰太白入尾大臣起兵人民多為妖 郝萌曰太白出入留舍尾春秋糴貴又曰守尾近女主去遠女主廢

甘德曰太白守尾宮人有罪者 石申曰太白入尾西方起兵近臣為亂 武密曰太白留守尾兵起於野 又占曰皇后宮嬪或貴相有憂 李佺曰太白出入留守尾兵起於野

晉惠帝光熙元年四月太白失行自翼入尾箕占曰太白失行而北是謂反生不有破軍必有屠城五月汲桑攻鄴魏郡太守馮嵩出戰大敗桑遂害東燕王騰殺萬餘人焚魏時宮室並盡矣

辰星犯尾宿占

天文錄曰辰星守尾則有水災民有疾入尾則魚鹽貴 荆州占曰辰星入尾江河決溢 甘德曰辰星守尾後宮有罪者 海中占曰辰星守尾有水兵起事必成 巫咸曰辰星入尾萬物不成民多疾病 武密曰辰星入尾色青黑故臣有歸者又曰後宮有省罷者 石申曰辰星守尾下賤易貴民多疾疫 客星犯尾宿占

天文錄曰客星入尾多移徙出於尾則歲有大風水災
天文摠論曰客星入尾則北夷饑有來歸國者出尾則後宮惡之守尾則有賤女來降者

陳卓曰客星出尾兵革罷幣民饑多水

黃帝占曰客出尾民多死 武容曰客星入尾宮人惡之又曰皇后去宮 海中占曰客星守尾賤女有暴貴者

晉孝武帝太元十八年二月客星在尾中至九月乃

滅占曰燕有兵喪二年慕容垂遣息寶伐魏反為所破死者數萬人二十一年垂死國遂棄亡

彗星犯尾宿占

天文錄曰彗星干守尾有土功出尾有水災

天文摠論曰彗星出入尾則貴臣誅 石申曰彗星

干犯守尾皇后有以珠玉簪珥惑天子者誣讒起李淳風曰彗星犯尾宮人出兵起宮門多土功

孛星犯尾宿占

天文錄曰孛星干守尾宮人出 天文摠論曰孛星出入尾貴臣憂 李淳風曰孛星干犯尾多土功事 石申曰孛星犯尾大臣憂誅 陳卓曰孛星出尾大水民饑

魏少帝正始元年十月乙酉彗星見西方在尾長二丈拂牽牛占曰尾為燕又為吳牛亦吳越之分二年五月吳遣三將寇邊吳太子登卒是時討諸葛恪於皖太尉滿寵薨之應

流星犯尾宿占

天文錄曰流星入尾諸侯客有使來出尾則君使人於諸侯 天文摠論曰流星入尾而色青則舊臣有來歸者 李淳風曰流星犯尾春夏犯則後宮口舌秋冬犯賢良用事妖言盛佞人受誅

郗萌曰流星入尾宮中忌之 武密曰流星出尾色青黑臣有逃者若抵尾則后妃有喪女主不安 乙巳略例占曰流星出尾後宮有喜亦為有子孫

喜入尾后族進祿若色白後宮妾死又曰出入尾風雨時田苗成天下物賤

晉中宗元皇帝永昌元年七月甲午有流星大如瓮長百餘丈青赤色從西方來至尾分爲百餘歧或散時王敷之亂百姓流亡

雲氣犯尾宿占

天文錄曰蒼氣入尾君故臣有來歸身者出尾則有臣亡赤黑氣入尾則諸侯王客有來使者

天文摠論曰青氣入尾外國有來降者青氣出尾臣有亂白雲氣入尾大臣有誅或方欲歸來者赤氣入尾有使來言兵事黑氣入尾有諸侯客來者

箕宿占

傳曰箕四星後宮妃后之府亦曰天津一曰天司空又曰天雞主八風書曰星有好風星有好雨謂月從星則有風雨箕畢星是也又主口舌蠻夷胡貊故蠻胡將動先表箕焉爾雅曰析木謂之津箕

斗之間漢津也 陶隱居曰箕為後宮別府主三
妃九嬪二十一世婦八十一御妻者也 郝萌曰箕星明
大則歲豐國無讒佞不明則歲中儉 石申曰箕
星動蠻夷有使來又曰箕星舌若動不出三日有
大風揚沙 黃帝占曰箕星不正則兵 郝萌曰箕
星離徙天下不安民人移徙又曰天下安樂則箕中
星衆天下不安則箕中星少少則糴貴

箕宿所管星

乾象十七

二十七

糠星 農丈人 杵星 市樓 東五 宗人 宗星

屠肆 帛度 天市 東垣 天鑰 女床 天梧

日蝕箕宿占

天文錄曰日蝕箕則將有疾 天文摠論曰日蝕箕

有大風發屋折木飛沙走石有佞臣而害忠良

甘德曰日蝕在箕將有疾風 石申曰日蝕在箕大臣

有憂亦主皇后崩 李淳風曰日蝕在箕戒之於

出入

日暈箕宿占

天文摠論曰日暈箕後宮有相譖而坐罪也日暈箕國有妖言

月蝕箕宿占

天文錄曰月蝕箕御者樂人有當黜者又為風天文摠論曰月蝕箕其野車騎滿道 武密曰月蝕箕有水旱民饑 石申曰月蝕箕將有暴風陶隱居曰月蝕箕后惡之

月暈箕宿占

天文錄曰月暈箕國有風發屋北夷穀貴燕趙饑 天文摠論曰月暈箕則旱糴貴有暴風雨李淳風曰月暈箕五穀不成 武密曰月暈箕大將易 石申曰月暈箕其國有風傷 荊州占曰月暈箕北夷穀貴燕趙大饑又曰王者納后月犯箕宿占

天文錄曰月犯箕多風糴貴 天文摠論曰月犯

箕則早在箕而有變則有暴風雨 詩緯含文

嘉曰月至箕則風揚 春秋考異郵曰月失行

離於箕者多風

宋均曰
離歷也

黃帝占曰月犯箕糴貴

潛潭巴曰月入箕中則其國有憂 海中占曰月

犯箕女主有憂 郗萌曰月犯箕其國有軍將

死 石申曰月犯箕後宮干政 武密曰月入箕

天下旱法令不齊傷於酷暴

魏明帝嘉平五年六月庚辰月犯箕占曰軍將死

至正元元年正月鎮東將軍毋丘儉反敗死

宋孝武帝大明四年十二月月犯箕東北星占曰女

主憂後穆皇后崩

歲星犯箕宿占

天文摠論曰歲星入箕則宮內有口舌相譖佞守犯

乘凌箕宿其歲多惡風五穀貴 李淳風曰歲

星入箕踵者歲中熟又曰歲星在箕南旱在箕北

有水又曰歲星入箕中行疾宮中有相讒事若守

乘犯箕多惡風穀貴 武容曰歲星入箕天下
亂 石申曰歲星守箕民多饑死

熒惑犯箕宿占

天文錄曰熒惑守箕則燕王有疾又曰地動

天文摠論曰熒惑入箕旱 武容曰熒惑出天梁

守箕大赦 陶隱居曰熒惑久守箕有水災

海中占^曰熒惑守箕大旱 郝萌曰熒惑守箕國

政急貴人多病死 黃帝占曰熒惑守箕燕王病

荊州占曰熒惑十月守箕天下大火糴貴 郝萌曰

熒惑逆行守箕諸侯相謀 石申曰熒惑環繞勾

己箕大臣誅守久民流亡 李淳風曰熒惑守箕人主

惡之

晉惠帝永康元年八月熒惑入箕占曰人主失位兵

起明年趙王倫篡位改元尋爲大兵所滅

填星犯箕宿占

天文錄曰填星守箕后貴人大喜若有土功事

天文摠論曰填星犯箕則女主有憂久留則有赦守箕而色光黃潤則太后有喜慶 李淳風曰填星守箕女主有憂有赦又曰填星出入箕留守之九十日人流亡兵起

郝萌曰填星留守箕其年多蝗虫 石申曰填星守箕立后貴人出

海中占曰填星守箕有大喪有土功事

石申曰填星守箕萬物不成水災兵起

太白犯箕宿占

天文錄曰太白入箕中有赦出箕雜貴有德令若土功事 天文摠論曰太白犯箕女主有喜守箕有

兵 郝萌曰太白出入留舍箕五穀不登多蝗虫

巫咸曰太白守箕民多疾病 荆州占曰太白守箕多旱大風人民有誹謗者 石申曰太白守箕兵起有赦守則久旱

武密曰太白犯箕女主有喜

辰星犯箕宿占

天文錄曰辰星守箕則旱 天文摠論曰辰星犯箕有赦守箕則其分有災三日內有風雨解之無咎 武密曰辰星守箕角動搖色青有臣自戮死 陳卓曰辰星犯箕河水大溢 巫咸曰辰星犯箕旱多火災五穀不成 黃帝占曰辰星犯箕七日巳內有火災若有疾風解之 郝萌曰辰星犯箕有兵執政者當之 石申曰辰星守箕五穀不成

乾象十七

三十一

武密曰辰星入箕大赦

客星犯箕宿占

天文錄曰客星出箕民饑大臣有見棄者入箕北夷饑 天文摠論曰客星入箕有土功事守箕則秋冬有水災 武密曰客星入箕則有風雨

荆州占曰客星入箕多風暴雨宮女不安或外國有使來一曰棺木用 郝萌曰客星入箕民流亡若出箕宮人出 黃帝占曰客星守箕多土功事

又曰守箕北小熟守箕東大熟守箕南小饑守箕西大饑 石申曰客星守箕天下饑色赤則為兵

彗星犯箕宿占

天文錄曰彗星出箕則旱穀貴 天文摠論曰彗星出犯守箕則東夷水族自誅滅 詩緯舍神務曰彗星守箕東夷為亂 武密曰彗星出箕夷狄為亂大旱兵起

孛星犯箕宿占

乾象十七

三十三

天文摠論曰孛星出犯箕夷狄亂糴貴守箕東夷水災 武密曰孛星守箕水居將為亂海中占曰孛星出箕穀貴大旱民多死者

流星犯箕宿占

天文摠論曰流星出箕則宮人有出者 武密曰流星交對抵箕則宮人不安 李淳風曰流星犯箕春夏犯則金玉貴秋冬犯則土功興王者大作宮殿峻城隍 乙巳略例占曰流星入箕多風

雨若色黃爲大臣出使又曰蠻夷來貢

晉穆帝永和八年六月有流星大如三斗魁在箕斗之間燕分占曰爲營首營首之下其地血流是時慕容儼僭稱大燕攻伐不已

雲氣犯箕宿占

天文錄曰蒼白氣出箕則國災除入箕則蠻夷客來見又曰有美女喜黃氣出箕則天子有使出

天文摠論曰青雲氣出箕其分災除不爾四夷

乾象十七

三五

來降者黃氣入箕則四夷來貢獻者黃白氣入箕則外國當有進美人來

斗宿占

傳曰南斗六星天廟也丞相太宰之位主稟賢進士稟授爵祿又主兵一曰天機南二星天庫樓也天梁也中央二星天相也北二星天府庭也謂南星者魁星也北星者杓星也第一星曰北亭一曰天關一曰鈇鉞石申曰魁第一星主吳第二星主會稽第三

星主丹陽第四星主豫章第五星主廬江第六星
主九江 甘德曰斗星盛明則王道和平天下安寧
主長壽將相同心斗星不明大小失次王者失位斗
宿芒角動搖則國失忠臣天下多愁 郗萌曰斗
星明大則爵祿行五穀熟其臣得勢而親近風雨
以時 陶隱居曰南斗主天子壽命之期亦主宰
相爵祿之位

斗宿所管星

龍象十七

三十五

鬘星 天淵 狗星 天田 建星 天弁

河鼓 右旗 天雞 狗國 織女 漸臺

輦道 左旗 九坎西三 天津西一 敗瓜

日蝕斗宿占

天文錄曰日在斗蝕則戒之在后夫人姪娣且有相
使巫祠祀求幸於主者 天文摠論曰日蝕南斗
將相有憂 李淳風曰日蝕在斗其國兵起
石申曰日蝕南斗皇后有災 海中占曰日蝕南斗

將相受戮 武密曰日蝕在斗吳分有兵

陶隱居曰日蝕南斗帝惡之

日暈斗宿占

天文摠論曰日暈南斗則宰相有憂 武密曰日

暈南斗宗廟不安臣有憂

月蝕斗宿占

天文錄曰蝕斗則后夫人姪娣當有黜者 天文摠

論曰月蝕南斗其國饑 李淳風曰月蝕南斗有

小兵 石申曰月蝕南斗皇后有憂

月暈斗宿占

天文錄曰月暈南斗大將憂 郝萌曰月暈南斗

大將死民流亡馬多病 陳卓曰月暈南斗大臣

免五穀不成 巫咸曰月暈南斗國相死

月犯斗宿占

天文錄曰月犯南斗臣將黜不則將死風雨不時大

臣誅月一歲三入斗其歲有赦 天文摠論曰月犯

南斗近臣去在斗有變易相爵祿失大臣憂刑戮
不然上卿非理失 郗萌日月宿斗有風一日雨
若宿魁中大人憂 黃帝占日月以十一月四月入
南斗天下大赦 郗萌日月一歲三入南斗口者其
歲有赦 河圖帝覽嬉日月犯斗大臣將兵
陳卓日月犯南斗風雨不時 郗萌日月乘斗斗
色惡丞相死又日月變於斗有亂臣更天子法令
者 李淳風日月入南斗魁大臣太子辱宮中有賊
武密日月入南斗女主憂又占曰趙魏有兵
晉穆帝永和九年二月乙巳月入南斗占曰兵起是
時帝幼沖母后稱制將相有隙兵革連起慕容
雋僭號稱燕王攻伐不休

晉安帝元興二年六月甲辰月奄南斗第四星占
曰大臣誅不出三年後二年十二月桓玄篡位放遷
帝后於潯陽以永安何皇后為零陵君三年二月
劉裕盡誅桓氏

唐代宗永泰十二年正月月入南斗魁占曰大臣死至三月乙卯梁國公李抱玉卒

歲星犯斗宿占

天文錄曰歲星犯守南斗有赦大臣逆憂逆行在斗則君賞賜 天文摠論曰歲星經南斗得度其色光潤明大則國有福大豐稔如其星有變失節則其分有憂 李淳風曰歲星犯南斗有大赦

陶隱居曰歲星守南斗經六十日則有臣增受爵祿

乾象十七

三十九

若久守斗則有水災 石申曰歲星久守南斗則穀貴 荊州占曰歲星入南斗二十日已上至二百四十日王者有德令忠臣用若犯守大臣有謀逆

陳卓曰歲星入南斗魁中央留二十日已上卿相有殃 鄰萌曰歲星守犯南斗百日兵用大臣死若退而守斗其國有兵客軍敗又曰歲星處斗東馬多死處斗南人多病寒熱處斗西虎狼多傷人處斗北不利小兒歲旱牛多死又曰歲星逆行斗其君賞賜

非其人 荆州占曰歲星居南斗君臣俱明天下更年
五禮興若既去而復還居之久不易其色常光明
者天下同心 武密曰歲星經南斗魁失道者死又
曰歲星經斗吳國福大熟 李淳風曰歲星入南斗
有赦若乘凌南斗大臣有伏誅者 石申曰歲星
守南斗大臣受封若逆入南斗魁中大臣謀叛兵起
水災米貴

梁高祖開平元年四月甲子即位先是唐乾符中

歲星入南斗晉國公王鐸問太子詹事邊崗曰是
何祥也崗曰歲星入斗帝王之兆歲星在斗下於文
爲朱字當有朱氏王天下木數三其應在三紀至
是果應

唐肅宗永泰九年十二月甲寅歲星合於南斗二月
河陽軍亂逐常休明三月陝州軍亂逐李國清

唐代宗大曆十年正月甲寅歲星合于南斗占曰有
亂兵至三月甲午陝州軍亂逐觀察使李國清縱

兵大掠一夕方定

熒惑犯斗宿占

天文錄曰熒惑守南斗二十日糴貴有大赦若守四
十日則有德令 天文摠論曰熒惑犯南斗有赦令
陶隱居曰熒惑守斗其國有兵相出 武密曰熒
惑犯南斗有破軍殺將道路不通丞相有事若既
去而復還居之宰相死又曰熒惑守南斗為亂為
賊為兵若久留之災甚

乾象十七

四十一

石申曰熒惑入斗内外有謀 郝萌曰熒惑過南

斗出斗上行天子憂出斗下行臣有憂又曰熒惑留

斗無功者賞 黃帝占曰熒惑守南斗糴貴守七

日已上太子有疾十二日已上庶子當之 海中占曰熒

惑守斗旱多火災若逆行斗天下驚若舍斗環繞

成勾己者太尉上卿宰相憂 郝萌曰熒惑逆行三

芒入南斗中其下國主死一日地動嬰兒多死關梁不

通留二十日已上出復入大人憂期五月 武密曰熒

惑犯南斗多火災又曰暴兵死 陶隱居曰熒惑入南斗兵起於吳越大饑 李佺曰熒惑犯南斗破軍殺將

晉安帝義熙二年八月癸亥熒惑犯南斗第五星占曰有兵至四年正月武陵王遵薨五年慕容超復寇淮北四月劉裕大軍討之拔臨朐又圍廣固拔之後周宣帝大象元年八月辛巳熒惑犯南斗第五星占曰南斗為爵祿至壬午以上柱國雍州牧畢王顯為

太師

隋煬帝大業九年五月丁未熒惑逆行入南斗色赤如血光芒震耀長七八尺於斗中勾已而行占曰有反臣道路不通國大亂兵大起斗吳越分野後楊玄感反於越七月宇文述討平之

唐代宗大曆二年七月乙丑熒惑犯南斗占曰斗為南越熒惑犯之有兵至辛未桂州山獠陷州城刺史李良遁去之

填星犯斗宿占

天文錄曰填星守南斗在陽則田宅貴在陰則田宅賤逆行南斗則地動王有賞賜 天文摠論曰填星逆行南斗先水後旱守南斗則國多義士大臣不安當有出者 郝萌曰填星亂行入南斗其國失地若無淫於樂無見諸侯之客無出遊即止若逆行斗地動賞賜失又曰女主賞賜不當若出入留舍斗中二十日不下必有大喪 荊州占曰填星守斗大臣叛又

曰在斗陽田宅貴在斗陰田宅賤又曰填星入南斗外國使來見填星出南斗主遣使至外國皆期一月 荊州占曰填星入南斗中將軍戮若去復還將死之 司馬彪漢志曰填星入南斗中貴人將相死 李淳風曰填星守南斗先水後旱若守一旬者則有暴水出 武密曰填星守南斗君臣俱不安國有黜者

晉懷帝永嘉三年填星久守南斗占曰填星所居

久者其國有福是時安東將軍瑯琊王始有揚土其
年十月地動陳卓以為是地動應也

太白犯斗宿占

天文錄曰太白入南斗則外國有使來見出斗則主
遣使至外國皆期三十日守斗魁二十日則大赦

天文摠論曰太白犯南斗七寸已下此者為陰乘陽
小人在位 李淳風曰太白入南斗則天下受爵祿
陶隱居曰太白守南斗執政臣為叛若太白與熒惑

俱入南斗名曰爍必有臣子為逆久留禍遲事大若經
過速者禍疾事輕 石申曰太白守南斗大臣謀叛
武密曰太白入南斗將相有出者若犯守南斗國有
兵事若留守之破軍殺將若守斗七日夷狄來若廟
堂兵起 李佺曰太白守南斗將軍戮

吳孫亮太平元年九月壬辰太白犯南斗占曰太白犯
斗國有兵大臣有反者明年諸葛誕反又明年孫綝
廢亮吳魏並有兵事

後周宣帝大象元年九月己酉太白入南斗遣上柱國鄭國公韋孝寬為行軍元帥伐陳

辰星犯斗宿占

天文錄曰辰星犯南斗邦邑有水守南斗五穀不成
天文摠論曰辰星犯南斗臣誅色黑小則其分憂

陶隱居曰辰星入南斗其分兵起人饑 石申

曰辰星守南斗則水災 荊州占曰辰星守斗

斧鉞用 陳卓曰辰星犯南斗其邦有兵若

卷十七

四十四

守斗萬物不成五穀傷 石申曰辰星守南斗

赤而有角天下敗白而大天下兵 郗萌曰辰

星守南斗黑而小其下國亡有兵易政 石申曰

辰星守南斗水災

唐文宗開成四年正月丁巳辰星合于南斗占曰
有兵喪改立王公次年正月辛巳上崩於大明宮

客星犯斗宿占

天文錄曰客星犯南斗其國兵起守南斗則諸侯

有客來見天子者出南斗則天子使人之諸侯客
星色青言憂色赤言兵色黃言土功色白言義
色黑言凶 天文惣論曰客星入南斗中七日不
去則天下有赦不出一年 武密曰客星入南斗
外國來降守斗則天下有喜五穀大熟 甘德曰
客星犯南斗其國必亂期一年 黃帝曰客星入
南斗中三日不出道路不通貴人坐之 夏氏占
曰客星入南斗諸侯相攻 郗萌曰客星入南斗

卷第七

四十五

多盜賊諸侯謀王者又曰大旱宮廟多火災官兵
憂民多病若赤白星出斗魁前宮室兵起出斗
魁中將死 陳卓曰客星入南斗五穀不登民相攻
班固漢志曰客星在南斗爲水爲饑 武密曰客
星入南斗獄官憂 李淳風曰客星犯南斗其國必
亂 陶隱居曰客星守斗第二星水災人相食若
色赤入斗兵起將死 石申曰客星守南斗多盜
賊五穀貴

彗星犯斗宿占

天文錄曰彗星出南斗則其分有謀入南斗中有
火燒寶 天文摠論曰彗星出斗又犯其國主
憂 武密曰彗星出南斗有水災 孝經雌雄
圖曰彗星出南斗宮中失火 荊州占曰彗星出斗
下謀上 陳卓曰彗星出南斗王者病諸侯不通
李淳風曰彗星入南斗大臣謀叛 武密曰彗星出
南斗其分有亂兵

孛星犯斗宿占

天文錄曰孛星出南斗其國有兵 天文摠論曰孛
星出南斗其國憂疾 李淳風曰孛星入南斗
下謀上 武密曰孛星入南斗其分有亂兵
晉武帝太康八年九月星孛于南斗長數十丈十
餘日滅占曰斗主爵祿國有大憂一曰孛于斗王者
疾病天下易政大亂兵起至太康末武帝耽宴遊
多疾病而崩永平初諸王舉兵天下大亂

晉成帝咸和四年七月有星孛于西北犯南斗二十三
日滅占曰爲兵亂十二月郭默殺江州刺史劉胤荆
州刺史陶侃討默斬之時石勒又始僭號

流星犯斗宿占

天文錄曰使星從南斗走北其國有赦令 天文惣
論曰流星入南斗有使來中國 武密曰流星出南
斗大臣有出使者 李淳風曰流星犯南斗宰相有
憂春犯斗天子有壽夏犯有水災秋犯則相當

黜陟者冬犯斗大臣逆 乙巳略例占曰流星入南斗
蠻夷來貢一日大臣入賀天子若流星赤如火光炸
或赤色出斗者大臣死若色白入斗中相死 郝萌
曰流星從南斗出有赦令

後周宣帝大象元年十一月乙酉有大星東南南流入南
斗光明燭地占曰斗爲吳是月韋孝寬拔壽陽祀
國公亮拔黃城梁士彥拔廣陵陳人退走於是江
北盡平

雲氣犯斗宿占

天文錄曰蒼白氣入南斗則多風赤氣入斗則旱出南斗有小兵從之黃白氣潤澤入南斗四方諸侯客有來見天子者出斗天子有使於諸侯 天文摠論曰白雲氣入南斗有雨 武密曰赤氣入南斗兵起宮廟有火黑氣奄南斗主病五色氣奄斗吳有兵

魏高貴鄉公正元元年十一月白氣出南斗側廣數

乾象十七

一八

丈長竟天王肅曰蚩尤之旗也東南其有亂乎至二年鎮東大將軍毋丘儉等據淮南叛景帝討平之

景祐乾象新書心尾箕斗四宿占卷第十七

炎訖

元豐元年三月 日楷書臣蘇 宗亮 書

校定將仕郎守司天監主簿充翰林天文同測驗渾儀臣趙 靖

校定將仕郎守司天靈臺郎充翰林天文同測驗渾儀賜緋臣董 惟正

校定文林郎守司天監主簿同知算造臣周 日新

校定文林郎守司天監主簿同管句測驗渾儀臣于 太古

校定文林郎守司天監主簿充翰林天文同測驗渾儀臣王 應

校定承務郎守司夫監丞管句書籍臣王 大明

校定儒林郎守司天監丞充曆算主簿兼同知算造臣楊 得言

校定朝奉郎尚書庫部員外郎守曆算司官權同管句算事兼同知算造臣周 琮

校定通直郎守司天中官正權判司天監兼提點曆書騎都尉賜紫金魚袋臣丁 洵

樞密直學士尚書司郎兼侍讀智通銀臺司兼判駁事兼專功提舉進奏院判寺簿兼提儀鼎審察院事提

舉司天監事詳定郊廟奏祠禮護軍新郡開國侯食邑五百錫紫金魚袋臣陳 襄

五面



